

四庫全書

集部

欽定四庫全書

集部

中州名賢文表卷

二十九
三十

詳校官中書臣瞿照

助教臣常循覆勘

總校官庶吉士臣朱 鈐

校對官編修臣廬 燧

謄錄監生臣李世麟

欽定四庫全書

中州名賢文表卷二十九

明 劉昌 編

富珠哩文靖公

碑銘

真定路宣聖廟碑

初鎮州置真定路以中山冀晉趙深蠡府一州五土地
人民奉我睿宗仁聖景襄皇帝顯懿莊聖皇后湯沐首
務立學養士當是時也世祖聖德神功文武皇帝淵潛

朔庭聞鎮之學緩未即敕龍集丁未敕有司勿怠其事
於是以金粟岡廟址崇殿廡闢舍太原元好問有記
越十有四年庚申世皇即祚都燕統一八表置憲肅郡
府鎮憲為諸道之冠庠序闕略必憲人府人胥議興治
至元暨今雖屢加葺猶有未備至順辛未憲暨府議倡
集楮幣三萬市物傭工募役自殿之廡自廡之門新其
屋楹三十有二棟宇軒楯拱挾環合左右翔峙作杏壇
於殿之北神厨於廟之東自廟徂學門垣櫺栳循序森

立瓦墁締築堅麗於舊先是府尹瑪蘇庫已基未構而
去政人遷易者十餘年尹張猛合倅和則平治中和允
升繼至憲使托歡提其綱賓佐韓復理其目始克有濟
其年夏告成壬申春府遣吏李明善介徵士瞻思狀來
請志其績州嘗貳憲燕南義不容讓稽宋蔡京遷學陸
佃記略曰真定雖塞北有江南之勝江南豪傑特起如
臨川王公與孟子相上下真定初未有聞噫是何言之
怪也真定者冀州東垣堯舊封也昔帝堯以帝嚳子侯

恆山之唐自唐侯即天子位徙山之西號陶唐氏太行
東西境數千里皆帝所圻真定固神明之宅也孔子經
法於易則邈伏羲以本無言書則始唐虞以道政事詩
則采殷周以正性情春秋則黜五霸以嚴名分禮樂升
降以鑑窪隆天人之道至矣廼曰惟天爲大惟堯則之
唐韓愈謂堯以道傳舜禹湯文武周公孔子孟子蓋孔
氏立教如帝典微言如三謨帝堯孔子位不同而同聖
王安石背道迷經蒙君誤國京仞傾黨滋熾世益大壞

河南程氏兄弟承先聖之緒抹之終賴其言道不墜地
新安朱氏師則兩程裒輯遺言貫通折衷以悟百世先
正許文正公見其書神感明會相我世皇同符堯舜世
道人心翕然大正洙泗淵源日月昭朗今神聖繼興世
日趨治鎮股肱郡也帝堯之思在焉朝廷之化先焉崇
事先聖所以教也鎮士知所嚮往下學上達尊經慎藝
何德不進何業不修何邪不鑑何古不及憲牧之輔治
教縉紳之報君父於是乎在廼賦詩以慰鎮人士曰

太行之山潯池之水孰古與美陶唐之里潯池之潯太
行之所孰今與伍皇祖之土恆山嶙嶙潯水沄沄昊天
生民思堯之仁潯水湯湯恆山蒼蒼帝堯相望於赫世
皇始鎮之府時未忘武維士與女澤沐時雨龍德出潛
萬方既瞻春熙秋嚴自北而南皇風斯扇時雍於變視
彼侯甸恆鎮之先大殿周廡先聖之宇久未今覩誰敢
予侮有廟有庭有戶有局肅肅其凝昭昭其靈新是鎮
學式對恆嶽惟士也確順我先覺求門於牆求室於堂

伊洛考亭使我不盲惟聖之玄惟王之素園冠方屨天地之度侃侃閭閻夫夫申申如目之眴如躬之親既儼既翼臨汝明德以賓皇國方州是則鎮人聚喜歸功憲紀憲人曰止其誰敢爾顒望神京稽首奉揚配天無疆天子之光

平章政事致仕尚公神道碑

大德八年春三月己巳中書左丞尚公請老上不允若曰其服朕命母怠冬十月稱疾力請予告九年春還保

定時年六十有九明年夏六月拜昭文館大學士資德
大夫中書右丞商議中書省事召不起武宗即位加榮
祿大夫預司農司事中書職仍舊召秋九月覲龍虎臺
大臣莫不譽公上悅若曰衆以卿宣力我家爭譽其賢
故耳公再拜稱觴上萬歲壽御璣賜之酒故事酒答臣
下璣人授之不親賜也時特授公左右相目嗟異冬十
有一月東宮賜宴翰林俄以疾還至大二年春正月使
召辭三年冬十月贈爵三代仁皇出震召問大計稱旨

賜宴清勝園皇太后賜宴南園夏五月丐去陛辭上御
武帳聞之以氣暄室隘敕近臣出諭若曰卿來盡心獻
納朕未始不從稱老懷歸豈遽忘國家耶凡益國便民
其以疏聞當行朕即行之敕宰相李道復等進秩慰餞
遂加銀青職仍舊賜白金百兩金綺二匹宴中書驛送
還歸時年七十有五延祐五年制贈曾祖考仲資善大
夫翰林學士上護軍追封上黨郡公妣魏氏郡夫人祖
考安榮祿大夫大司農柱國祁國公妣王氏國夫人考

汝楫銀青榮祿大夫大司徒上柱國祁國公妣李妻魏
皆國夫人六年春正月拜太子詹事使三往迺起三月
辛酉見上嘉禧殿之後閣上顧太保庫楚目公曰是自
世祖皇帝効力潔淨人也徐曰周卿汝前汝知古今識
道理練大務太子託汝善輔之有言勿吝善教之此朕
意也公見皇太子首以念祖宗孝兩宮養德性辨邪正
陳之太子異其言夏五月北幸觀花園北行殿上若曰
朕不文直諭汝勿惜盡言教太子賜尚醞馬酒各一罌

詹事俸入不受俄謝歸時年八十有二泰定三年以中
書平章政事致仕制授於其家賜楮泉萬緡綺帛四端
尚酒二尊公表謝復賜酒時年九十有一朝廷尊賢養
老思輔長治其見於公如此四年十月八日薨享年九
十二訃聞制贈推誠佐治寅亮功臣金紫光祿大夫大
司徒上柱國追封齊國公諡正獻公諱文字周卿祁州
深澤人幼嗜學甫踰冠卓邁有聞世皇御極急務求賢
二三大臣體上意銳采擇中統元年張忠宣公文謙宣

撫河東還故參知政事王椅薦公忠宣奇之辟掌書記至元元年辟西夏行中書書表二年始立朝儀詔魁賢鉅德者討論詳定太保劉文貞公秉忠薦公參預凡常朝朔望起居元日冬至會覲再拜内外文武仗衛布置服色差等圖象規製皆公掌之節次入奏清問所及必公條對明白久之聖鑑通朗敕結綵畫位皇城之東百官肄習上御法座臨之見大書宸極御座之居上召公問之對曰天極居中衆星環拱帝德無爲天下歸之其象

類此上悅習已大悅遂爲定制播告天下七年敕知事
大農八年轉大農都事禮成置侍儀司大保以公見上
仁智殿擢右直侍儀使十有二年復都事大農其佐農
政也置七道巡行勸農事聯保五課耕桑修水利立社
學築義倉革浮薄禁游惰多自公畫十有七年出守輝
州不事刑撻因其土俗以禮導之令行禁止河朔大旱
禱輒雨歲大熟踰境旱自若也聞者異之懷孟馬氏宋
氏被誣殺人訟蔓不決提刑部使檄公猷之推跡究情

得尉史獄卒鍊喉狀兩獄皆雪牧輝二年民安事洽十九年冬召拜戶部司金郎中初竹稅置提舉隸省部懷衛居民犯一筭一竹率以私論至破家至是抗言罷之課入郡邑害遂弭明年秋使山東定征稅度風土市廛立中制江西省憲交訟裕皇令中書公奉教訊詰罷省臣宣慰臣各一追白金千二百兩二十一年冬改戶部郎中明年春都事御史臺會聚斂臣達拉木珪阿薩爾等謂海內財穀省院臺內外監守里魁什長率有欺蠹請大

蒐挾上允敕衆勿沮利黨嘯結允壬儼使旁午省臣御史掾吏民庶懼寔陷日衆人情危駭先此南臺御史封章言帝春秋高宜禪位於皇太子皇后不宜外預太子聞之懼公因祕之以杜讒隙此曹覘之鉗臺史督索公白中書右丞相安圖御史大夫伊囉勒拒之越翌日其黨以間敕大宗正薛尺玕取其章太子益懼二相憂變不測公思用拯之方閱舊案得允黨罪玷數十白大夫曰事急矣請就省圖之至遂說曰丞相大夫以勲貴忠

賢荷天寵柱石廊廟皇太子天下本固本安天下兩公
任也此輩傾險乘釁奮不逞祕章出禍可言邪今先計
奪謀使噤不容喙策之上也二相曰善入言狀上怒若
曰汝等無罪耶震勵未止丞相前曰臣等有罪不辭但
此黨名載刑書類非慎潔動必驚害生靈宜選重臣使
爲之長庶靖紛擾上徐霽威可其奏二相出宣制緩其
行兇燭爲沮俄而告賊賂者喧集事間天威大震或誅
或竄或奴時漢人臺臣皆闕公位幕佐以智勇忠義動

大臣悟明主殲大憝銷大釁旬日之間中外清泰聞者
壯之俄丞大農治京北屯田畎澮汎溢不畱二十四年
置尚書省柄臣顓政急賦讒戮大臣衆股栗使者四出
峻繩督務羸官緡徼賞悅公使燕南得鈔緡約四十萬
與民者三之二賞雖不及功亦見時至元鈔始行置寶
鈔提舉司隸都省金與銀禁私易小人挾威張畧獲飽
饕餮摧破民產動再年使江西治其敝吏行詐舞文各
以罪論或誣熊氏子買藏金尺吏訊則無之訊益酷乞

輸直不聽聚貸簪珥作新尺符其妄廼已劉氏子誣其弟貨利潛易金銀獄久不絕事皆類此公至率清脫民始寧息其年理鹽茗雜稅江右明年升少卿理獄理賦山之東署置濫濫汰之政令苛虐蠲之事理欺惑正之尚書省罷政歸中書遷吏部侍郎考覈尚書省臣鈐綜所不當最簿上之流品清別井井不紊始以肅政廉訪司憲諸道明年公使憲湖北初提刑按察之憲鄂也行省奏罷其司聽攝山南者再事滯民疚公曰此憎忌者

間之耳凡政刑大務卽省議之慶祝大禮赴省行之糾
按貪墨不少貸讒格政行民始受賜三十一年秋召爲
刑部尚書公以遠近稟決刑制不一吏誕民瘼請依古
律令采寬厚新憲章以一吏治不報成宗元貞元年春
拜侍御史會江浙省平章用虐行悖行臺御史浙西憲
人條狀彈劾制遣公泊大都護往詰之左驗明著平章
者挾貴驚岸不臣公等以聞平章者以國制軍數禁密
無敢或預御史嘗取數鎮兵於是藉其故擅驛走都以

相噬咋都省奏不用臺臣特以都護按問制可御史逼
威即承兩造具備敕省臺太師宣政等衆大臣雜議率
阿勢貴犯輕宜宥御史法當死公曰不然御史職號監
察今所繫者上欺下暴制使馳訊拒捍無禮罪重不輕
必以軍數有禁言之小吏佐書掌給鹽米甲簿伍籍數
誰不知況御史因兵卒交愬責令長帥均役情無害法
縱有罪亦輕不重皇上御大寶赦天下德洽民心豈宜
濫刑以累聖治議都堂三辨巖廊再衆列奏公廷爭剴

切上開悟平章御史各杖遣衆呼萬歲他日集肅政堂
衆憂省臺不協公曰天下無難事第恐處之失其要耳
都省長百司丞相握大柄相抗不敵動瀆天聽取厭傷
體自今而後狼貪虎暴者抨彈之事不涉私者正救之
果大鉏鋤論斥未晚何用紛紛衆避公言未久猜釋風
紀肅然二年請無數赦罷役不急上嘉納大德元年夏
河決蒲口冬公使憲河南明年春偕勅使相決河籌久
利公建言長河萬里湍猛東注下盟津地平土䟽蕩徙

不常失禹故蹟流患中土不知幾何千年孰保無患治
得其當則民省而患遲失之則力費而患速此定論也
今陳留抵睢東西百有餘里南岸故河口十一已塞者二
自涸者六通水者三岸高於水六七尺或四五尺北岸故
堤水高北田三四尺或高下等大較南高於北約八九
尺堤安得不破水安得不北也蒲口今決千有餘步迅
快東行得河舊瀆行二百里至歸德橫堤之下復會正
流或彊湮遏上決下潰終竟無成揆今之計河北郡縣

順水之性遠築長堤以禦汎濫歸德徐邳聽民避衝潰
圖所安嬰患戶齒河南淤田量給永業他決視此即救
患之良策也蒲口不塞便策上廷論從之河朔郡縣山
東憲部爭言果然則河北桑田盡化魚鱉之區矣塞之
便復之明年蒲口復決障塞之役無歲無之是後水北
入巴河復故道竟如公言三年秋憲山東宣慰使挾壻
宗室以浮論懲叛謂治淄青政宜猛故藉是久居方閫
外掠譽而內貪虐憲糾小有違言吠啞即至公度難力

欽定四庫全書

中華書局影印
卷二十九

爭使者往來公以溫言順附而嚴礪之彼乃感服其下
稔惡會有告者選官按詰得二十餘人決杖追贓以慰
惛弱遂大慙謝逐所親暱用事十餘輩歸民田二百餘
頃四年秋授中奉大夫參知政事行省江西既莅政以
吏選淆濁凡庠序之師軍民之佐財穀之主典隨事立
法負數百浹日皆注無復容私衆始睚眦終莫奪俄趣
公分鎮嶺南快私憤公曰此軍政也非制敕不敢行驛
使顯稟得報蒙古平章偕公在省餘以次出鎮衆計沮

事聽公決摧彊生枯濯煩疏壅省悟清簡六年秋九月
移疾北還冬十月拜江南行御史臺中丞辭明年召至
京師拜資善大夫中書左丞時朱張氏得罪省臣率譴
逐唯左丞相兩新平章洎公凡四人調變政務浙西水
沴民饑山東歲兇盜充獄公議發官廩周罄乏縮湧價
舒市易泄富足通閉遏責兼并仁客佃民能施米上三
百石爵有差得米石五十萬救吳越饑殍爲蘇出官緡
八百五十餘萬拯齊魯攸攘亦息選清望臣使十道宣

撫天下采訪其得失黜貪暴安善良江南官民田賦均減三之一西方學浮圖氏號白雲宗者髮而妻子田宅誅愚蒙託祝釐逭徭賦倖習甘賄秦爲總攝錫印章郡縣富豪名署七千餘所衆數十萬於是罷之斥散黨與同民賦役時順德忠獻王達爾罕與君同心輔政選庶官齊百度罷斜封汰冗員絕寶貨約濫支節淫費量入制出擇民牧屏世守定贓律除虐禁明婚制阜民生綱正目舉有中統至元之風公粹美高亮行修潔年十六

七志學溯伊洛究洙泗完經大史諸子百家該洽無不
綜一以仁義爲根極孝友行業著見州閭大臣交薦聲
名日振世廟方大有爲衣冠元老森然以所能輔經緯
公翱翔上下畫佐開先實與有力歷事五朝才識宏經
濟功名映寰海德望尊廟堂忠信締淵穆懸車私第嗣
聖繼明眷注益渥使車累召進必勇退從容事外二十
餘年壽考康彊几杖清寂手不釋卷搢紳造之非聖賢
中道經綸大經置不談聞者隨其器量大小皆潤漑天

下望之若瑞星神岳素鎮嚴繇飲食動靜皆有節制居位應務察事理守名法簡易正大物無不容推行所宜不膠不固大政大節利不回威不屈仁勇沛然綽有餘裕古遺愛遺直公盡兼之於戲世皇長駕闊馭網羅英才培植之久大德卿相稱賢無右公者養賢資世豈易言哉公娶某氏子男某某孫男某某年月日葬完州某鄉某原公弟之子曹州判官克和以國子助教張執中所狀公行遂以銘託烏乎公往矣文行事功百世師也

其敢以昧陋讓銘曰

皇元統天大定于一聖聖明明崇建皇極三光五岳氣
象渾同天產人瑞以弼帝功瞻彼恆山峩峩大茂挺生
尚公神峰綜秀始遇世皇邁績華勲禮樂稽古稼穡養
民鴻臚大農事係賢哲左右後先夷夔稷禹朱轡五馬
衛源之許里詠塗歌神明父母孰驚皇靈乂鬯震搖用
輔執法正色立朝孰斲民力烈火凝霜用使四方雨澤
春陽孰縱陸梁摧我獬廌用立憲紀鋒稜益大孰徇貪

蠹杞彼鴻鈞用握政柄化育載新年鄰七袞勇於告老
天制臣義豈曰太早昔也廟朝淵淵昞軒后之鑑神
禹之鼎今也鄉社于于雍雍天下之表人中之龍有謁
其庭鄙吝清滌齒頰餘論皆世藥石道德之容禮樂之
度大醉而醒孰寐斯悟善數數之侯卿侯公百歲完潔
其誰儼隆有德有文有位有壽功在史牒名垂宇宙太
行嶙嶙滹易汙刻此銘詩相配無垠

大都路都總管姚公神道碑

公姓姚氏諱天福字君祥拜監察御史彈擊權臣無所
顧畏世祖皇帝賜名巴爾斯國言虎也其係出唐賢相
文獻公元崇文獻諸孫伯祿卒絳州觀察判官葬絳之
稷山縣南陽里繇是世爲平陽絳人公考處士君諱君
實字仲華甫冠辟兵鴈門金進士趙泰以子妻之生公
及和衆主簿天祿公安白皙美風矩童丱不凡聞處士
訓忠孝奉受惟謹從事郡府挺潔不羣儕輩畏之仕懷
仁爲縣史世皇以太弟駐白登公從縣進蒲萄酒見奇

之畱侍宿衛至元初丞縣懷仁大帥楊庫庫楚薦其能
於丞相塔齊爾丞相奉使朔漠修睦宗藩引與之偕五
年立御史臺丞相爲大夫奏授架閣管勾秩將仕郎十
一年以承事郎拜御史十三年江南平冬十二月宰相
銜怒左遷同知衡州路明年春三月以朝列大夫改河
東山西道提刑按察副使佩金符夏六月拜治書侍御
史秩中順十六年春使憲淮西江北道秩嘉議十八年
憲江南湖北二十年夏憲遼東明年春以母老請歸養

不允二十二年春召爲刑部尚書秩通議逾年總管揚州不赴二十六年夏復憲淮西秩正議三十年拜中奉大夫甘肅等處行中書省參知政事以親辭改肅政廉訪司成宗即位使肅政廉訪於陝西元貞元年春三月遷眞定總管冬丁太夫人憂自鴈門徙處士君樞合葬絳之稷山中書起公還眞定大德三年春二月拜江西行中書參知政事辭奉使山東還四年秋七月以通奉大夫參知政事行大都路都總管兼大興府尹本路諸

軍輿魯總管管內勸農事六年春正月二十有八日薨
於位年七十有三公至元名臣勲德焯著其薨也朝廷
悼惜吏士護喪歸平陽以夏四月某日葬稷山西北嘉
禾里泰定三年以子侃請制贈正奉大夫河南江北行
中書參知政事護軍追封平陽郡公諡忠肅天厯己巳
侃以公行實徵銘神道之碑不獲終辭因采其本末而
次第之公始爲御史條奏宰相阿哈瑪特罪二十有四召
廷辨公枚數其罪彼輒引服數至於三氣沮情駭上動

色若曰此三者罪已不宥目公曰巴爾斯臣下有違太祖之制干朕之紀者汝抨擊勿隱廷臣震竦其事今祕世未有聞時方倚相理財姑釋不問衆亦爲公危之太夫人趙君有賢識勗公曰國爾忘家汝第盡力果不測吾追蹤陵母死日猶生年公泣謝白其長曰萬一得譴乞不以老母坐連也語聞上歎曰是母子有古義烈敕侍臣董文忠宣付史臣書之監大名堪布得罪御史按之至見毆辱繼用公往問道微服入境察悉其情還

取驛抵其所撻挾如神簿責死罪十有七械送輦下俄以宥免經臺門大詬公在察院促捕之檢行橐得賂侍御史安威實訥救免狀即桎堪布而祕其事夜用巡符託詞邏奄至一道士室盡獲其賂明日陞奏上曰彼七死猶赦汝欲何爲公對罪十有七赦七留十餘誰任咎上悟戮堪布斥安時御史大夫二安善其一既斥與所善猶雙陸禁中公曰安庶人耳豈得與大臣狎叱令起座皆失色公即入奏一蛇九尾首動尾隨兩其首行

不能寸今憲不網蛇首二也上曰然一人二冠可乎召
兩大夫諭以公言大夫博囉懼以年少自劾罷有讒提
刑按察之不便者有旨罷之是時廣平貞憲王裕魯魯
爲御史大夫公告之曰往者悖叛蝟起鄣塞見聞今列
憲宇內廣視聽虞非常慮至深遠不但繩督有司而已
也纓纓陳之大夫悟矚然曰幾失是夜造禁密詳奏上
曰此天下安危計也其勿罷會駕北幸所擊相馳騎士
縛公閱其家脫粟數斛外得言事故崇羅織苛毒公亢

聲曰乘輿行狩戕害言官宰相寧欲反邪据拾無所得
斥遷衡州俄憲河東太原民飢開廩賑卹議者以擅罪
公上知不私置勿問朔方兵興役民轉粟人畜顛踣公
曰執政非策自處其本也投闕論奏改和糴疫療爲蘇
畱遷治書出憲淮西先是蘄黃有叛者將吏臧獲良民
以萬數公皆理歸民伍衆感泣相率立生祠徙節湖北
劾省臣楚國公罪以聞上閔其有勞爲痛治其黨會阿
哈瑪特敗大遣使治官隱遼東宣慰使阿喇卜丹權黨也

侵暴尤橫召公使遼至則封府庫究簿書審事察寃正
魁惡著公道使還即命長憲遼東公疾馳夜入詰旦莅
事民懽吏愕郡縣竦動初遼朔旱蝗公至雨澍蝗滅其
境域烏桓白霄故地也民喜畜牧習射獵不事耕學公
教以稼穡詩書居數年農勤士奮民之孝者旌之不義
而訟積年不決者訓睦之稔惡者懲艾之武平縣民劉
義訟其嫂與其所私同殺其兄成縣尹丁欽以成尸無
傷憂懣不食其妻韓問之欽告其故韓曰恐頂頗有丁

塗其跡耳視之果然獄定上譖公召欽諦詢之欽因矜其妻之能公曰若妻處子邪曰再醮令有司開其夫棺毒與成類并正其辜欽憐卒臺章以公詣平灤按總管劉納古伯公至劉欲遁去公密令憲僚張仲威作漁人匿西城橋伺之劉果與吏徒會橋下謀擒其愆仲威得真公一問皆伏吏胥之黠而虐扼民之吭而快其所欲而民莫敢校者率以罪黜平灤都吏張氏子尤狡而恃杖去之遠近震聳道行遵化風旋馬前公默謂之曰汝

冤從我吾爲汝理至縣舍風即見令縣以橐韉士從憲
儼覘之信宿及蒞薈而風息得五尸皆短衣其一衣中
得小印公下令居賈行商以端匹赴縣聽和市辨之賊
果執遼粟歲輸灤陽使督運急時民方饑公曰吾忍視
邪畱粟賑糶使不敢沮民賴以生遼人以公政通神明
追思惠化立祠頌德入長刑曹讞獄與衆不合歸臥於
家竟如公言衆得罪公望益隆淮西不治復握使節申
飭舊規風采立變初宣饒徽數州有亂者官軍併俘齊

民加以劫掠絡繹淮境公責守令嚴津防峻訶譴民復其鄉者數千餘家帥臣昂吉爾聞淮殆二十年位中書右丞以宣慰使操制兵民黨結中奧其子亦握兵煽虐奴官屬轢風紀莫敢誰何宿盜數十出沒淮海陸梁自宋未有制者宋亡帥葆芑其徒通納賄賂縱其所爲公遣健士襲捕得所匿兵仗貲財定案市殉者七人自是帥漁鷺狀百出公疏其跡取驛上聞帥鉅驛勿給公潛前走得驛馳去帥遣兵校丁文虎追刺公至六河館不

及公至揚州文虎亦至誣公於行臺俄而六河館人以
刺公狀聞文虎被執公赴覲制遣近侍阿珠治書侍御
史烏遜馳訊帥以罪廢已而赴闕以擅殺淮賊譖公不
中憤而斃淮境大寧丞相僧格之黨虐平陽者尤劇其
敗也用公尹其府以清宿蠹詢父老得郡邑田里真偽
利病緩急先後審行之民輯事理遼西吳氏子贗爲女
巫行眩衆事之若神人公洞其詐攝至府吏欲案究公
曰亂常之跡可侈言邪立命撲死衆股栗政關

驛

傳雜皆事

闕

痿大臣蠟真奉牧

闕

遂尹真

定道壅

闕

枯壯弱日聽愬

闕

堅動無泥闕

人人竝引衆走府治瞻判決優絀不與初饋餽不充徵

需日困公以楮鏹貸民因母取子繁畜孽豐廩稍闕大

賓館水碓創立如平陽用有餘羨宗親之位儻從之區

秩秩井井甲諸路歲省官帑而下不加擾憲人撫細故

効公中書敷奏事不涉私法可施用宜著令式以示他

州制可郡人集衆象龍祝雨公曰無益令撤去廼慮獄
囚底平允雨大霈驛置新樂北阻派水便价車騎自南
而北者雨溢夜暝野次無所建議徙置派南衆大便順
築寺五臺督民運木奪農壤衆令方急公不徙府懼佐
貳交諍之公曰吾民牧也惟民是恤請待農隙朝省爲
允樂城盜殺人取財夜舁尸置民隆氏邸縣笞伏隆氏
父及二子當死械囚送府哭於庭尸母辨賊無其子印
識公疑之會使者決大辟公給他賊承盜殺狀隆氏獄

緩真盜遂獲黜吏退胥之在民間者不啻百數劫持官府而肥其家拂其心則禍之管庫稅廩之徒往往破產質妻鬻子以償所欲而不敢與辨公劾農諸縣得其姓名杖死數人質鬻者還之餘多遁去或改行爲善士其尹京也立誠信繩桀驁挫強禦卹惇弱事至而斷豪右斂迹三河民藏古銅印怨家訟曰將謀作亂縣掇掠其因使符所訟至府辨其文曰三河縣印公曰何亂之爲以不輸官罪之制令尚廐芻稗以鹽易諸畿民霖溢害

稼公請市旁郡戶部據令督責上下洵懼公帥京屬從部白省竟以公謀寧息京甸京人弟假姊財不券姊廢益貧弟賈益富姊廢徵財弟曰有券即與姊憤懣聽者難之懣於公諭之曰汝但歸俟徐誅劫盜扳弟對詰大懼吐實暨姊中分其貲公果毅直諒立朝敢言操行清介忠孚信格有賜輒辭上至引唐太宗賞魏徵故事曉之對曰臣言分也受賞非分也竟不受持憲總郡皆有聲績以治盜赴鄂民衆衛送不絕盜聞之戒其徒曰姚

公正人也勿犯性孝太君年踰大耋公拜參知政事甘肅難於輦養辭不往世高其行縉紳推論聖朝人物骨鯁有爲終始不貳其操者公當第一固確論也蓋嘗稽之鴻惟世皇神鑑睿算長駕遠馭文武效能光輔丕業甸萬國冠百王盛矣然廊廟岳牧邪慝間出兜鍪劍擊之輩以佐命勲致封爵者或驕恣不法公起宿衛當至元之際奮下列搏權奸莅方州滌巨蠹使辨捷不能措其喙仇憤無所憑其兇風槩氣節炳耀一世淵衷之所

孚公論之所與豈徒然哉其忠義剛大蘊積有素故也
公揚歷四十餘年功名事業磊礫赫奕侃訪輯遺軼既
久始備因歎世有家者之子與孫或不侃若先烈湮滅
可勝惜哉敘而銘之或有待也公始娶趙氏繼楊氏皆
平陽郡夫人子男三人壽童蚤卒祖舜祕書著作郎卒
侃內藏庫副使楊夫人子也銘曰

帝運開大中統至元人傑斯寶匪寶璵璠惟天聰明憲
象執法元化宣朗昭融六合堂堂忠肅始我鷹冠謹言

正色英風夏寒虎炳其文山立殿陞禱杌饕餮魄褫魂
悻宸宸凝邃上動天容庭有直臣庶儆其同有鑒其明
有玉其潔桓桓其勇夬夬其決孰撓斯曲孰鍊斯柔善
善豈親惡惡豈仇雖千萬人莫沮吾往如脂如韋有泚
其顙侯符三剖憲節六持義槩秋凜仁術春熙上亮其
忠史載其信何勸不懷何懲不震碣石之北淮海之南
社稷尸祝無怠其嚴濤沱溶溶霍岳莪莪其融其結百
世不廟台鼎之崇芥視不屑京尹之雄莫仲與伯有烈

終始無間險夷誰近而忽益遠益思汾川西流河水東
會稷山之銘惟以永配

參知政事王公神道碑

至大元年汴梁路總管兼府尹王公年逾七十拜參知
政事行尚書省雲南秩中奉大夫仁宗皇帝以公至元
大德名臣拜昭文館大學士皆不果行延祐元年冬十
二月七日薨汴私第春秋七十有九明年春三月十二
日歸葬趙州寧晉之金符鄉換馬里中書以臺疏列公

行績以聞贈通奉大夫河南江北等處行中書省參知政事護軍追封太原郡公謚憲穆元統元年冬其仲子承務郎萬億賦源庫提舉鈞以翰林侍制蘇君天爵狀徵銘公碑紳汴諸生也其敢辭公諱忱字允中世居寧晉曾大考進晦彩不耀大考守忠金承信校尉考玉太祖皇帝威行中夏率郡民款附從太師國王穆呼哩用武有功累官定遠大將軍慶源軍節度副使夫人王氏生公剛毅正直讀經史不事空言能見之行事裕皇位

儲宮取勲舊子孫入侍公被選忠恪小心十有餘年日
慎一日或因事進說明諒不阿世祖皇帝察其能至元
十七年拜山北遼東道提刑按察副使秩朝列大夫東
藩諸王鷹人縱暴民大厭苦公繩以法遂斂避不敢犯
宰相哈瑪爾培克固寵希合之徒言利徼倖小吏耿熙
告北京宣慰臣逋官緡若干萬既聞勅徵之熙懼失實
增益制敕逮繫百餘人公疏其妄熙獲罪裕皇賓天儲
極虛位帝春秋高中外危之言者雖衆未見允可公建

言陛下臨御多歷年所至元初預建太子天下歸心鶴
馭上賓臣民憂懼惟早定大計以幸宗社章三上帝俞
其言俄勅皇孫佩信寶撫軍朔幕大業廼定二十四年
憲河南時南北既一無俚兇慝略民子女轉賣四方公
謂此徒於聖天子仁覆天下之政梗害非常建請嚴立
法禁從之遂著令甲息民汪清占息民籍已再世矣兵
豪狀愬帥府曰吾亡奴也即馳騎數十殺清滅口取其
妻孥貲產清子成逸出赴民有司愬之兵民文移往來

數年不決願兵朱喜始以避亂奴於人其主知其難於
奴也集鄉胥里長同署券免之隸願兵籍已久喜家火
其故主子謂券已焚而復奴之喜持券出愬訟不決皆
詣公愬之稽清占籍以歲壬寅其奴亡以甲辰喜券足
徵白之鎮南王府誣者皆屈明年兩訟之仇結近侍誣
奏公徇制下中書遣使收公案訊公疏臺請聞有旨馳
召入見數陳盡底蘊帝大悅曰若人非素餐者敕省臺
讌慰還職近侍及使者皆以賕敗清喜數百口脫虎噬

繪公像事之二十七年置肅政廉訪司以新憲度明年
公副使燕南河間鹽漕官守盜用賦緡十餘萬覈正其
辜諸王分地恩州其下以錢貸民加倍徵息公令子母
相當則止餘有罪先是以民入兵限私田四頃優其家
公曰國家取天下以來兵無寧歲今海內雖定征戍遠
方一兵歲費不啻千緡區區限畝豈易充給在民編者
守令猶歲差富貧以均其力一入戎行永不可變請增
田額使無饑寒內顧之憂不報其後以兵力乏竭敕樞

密召公等會議以真定順德廣平等路俾之詢簡得富民數百家充兵兵之貧者遣還民伍人服其平公以舊臣屢憲方州至是威名益振三十年拜廣西肅政廉訪使秩嘉議臺檄以其廉能曉諸道疾不赴成宗皇帝即位元貞二年春使憲河東召見柳林撫慰優渥會并汾旱饑請發粟賑哺全活者衆五臺大建佛廬敕中書擇銳事吏董役工部司程陸信驅民夫數千冒險伐木死虎豹蛇虺者百有餘人其時皇太后幸其所公入言以

寺福民福未及而害已甚非初意也徽聽開悟減其役
仍賜卹死者家宗王分土并門廩餼歲取民間或不能
供輒立契約毋息倍稱或不能償隸其子女民患苦之
公請出錢縣官贖還其親者百二十四人於是諸王膳
貲歲頒於官民瘼始蘇王嬖臣哈達布哈怙威肆虐公
按正款伏王爲之請弗聽王馳使譖公上未信會駕北
幸罪人亡走愬公不法敕中丞崔或問之俄或卒駕還
復愬詔省憲雜訊之無驗愬者抵罪由是王禁戢藩儼

民境晏寧大德三年遷江陵路總管不行七年遷汴梁
汴故宋金都邑號難治公至省人憲人以公舊望不敢
以府屬眎之政訟之難悉聽鑑裁下無隱情久之政清
訟簡吏民歌詠方宋包拯公莅汴之四年歲次丁未河
決原武注汴宋汴尤急吏士具舟楫以逭漂溺民大懼
公白省請疏導順下勢家以田疇不利難之公曰吾守
臣也當任其責即行河決壅以完城邑水息大築隄防
羌族礮手居鄆陵者萬餘室民役不預公督使趣工得

萬人不日隄成民至今思之公精明有斷不畏強禦所
至興學獎士脩政新民不專法令威愛兼行爲世名德
故姚文公燧劉文靜公因與公游雅相敬尚蘇君公鄉
人也時賢言行優於志載其言曰世皇天縱有爲公及
陳公天祥程公思廉姚公天福皆骨鯁敢言視社稷民
物利害若疾痛嗜欲在己才猷風采凜震一世庸夫庸
婦知其姓字豈聲音笑貌爲哉天故生之以弼治效善
論也公夫人張氏封太原郡夫人子男二人曰銳曰鈞

孫男三人洙浩以胄子肄業成均淵幼銳鈞皆有學行
翀固知之其諸孫爲胄子皆馴謹向學佳子弟也助教
陳旅云銘曰

世廟帝運鴻惟永年仁浹義洽德崇配天洛謂裕皇左
右前後侍衛僕從詢賢世胄時也憲穆宿衛青宮行必
循矩言必見忠涵育有年一靜一動帝曰良哉才可試
用卿貳東臬位四品秩碣石醫閭光昭化日來歸定省
遂莅河南上觸廷怒下驚狼貪帝曰忠哉斯豈尸位丞

相御史燕勞還轡皇鑑昭明飭新憲網卿才而舊益礪
干將太行西東鴻河南北草木知名山川正色棲遲晚
暮尹汴四封宋陳許鄭春陽誕充偁側將迎於此大府
齒健而獐猶憚巨處上獲下順居五閱年華髮蕭蕭益
壯益堅其卷其舒大義終始鋼百其鍊肯柔繞指五握
憲節郡符再分洪波砥柱屹立不羣政預鈞輔逝矣其
道文崇祕館允也其耄之顯高朗之幽神明之地列岳
之天列星滹沱之郊邯鄲之鄙刻銘豐碑徵信惇史

大元奉元明道宮修建碑銘并序

老子生殷亳社苦縣厲鄉曲仁里距縣東不半舍九龍井在焉崇事宮廟歷代相因憲宗皇帝四年龍集甲寅故太師汝南忠武張王閻亳得太清明道兩宮遺址兵燼悉爲荒墟以文之燕請事脩復長春嗣教真常大真人李宗師遣隱真大師提點石志玉通微大師知宮李志祕綜其務歲丙辰誠明真人張宗師奏請崇道真人張尊師棲雲真人王尊師主其宮制無幾何棲雲蛻化

其門人輩亦皆協力崇道則始終不懈未踰一紀締構宏麗允惟明道故宮以河渦混匯圯溺迨乎石李二公相繼爲真人結廬墾田充益歲廩事修治疏河流入北門繇是窪下澱而窪漫漶涸而燥至元壬辰棲神真人陳志微以陳道潤張道淵楊道和等率衆除荒實塹陶甃峙材準基定位以陳志和李道堅等協襄事功達之長春元逸真人張宗師用道潤提舉宮事大德己亥棟宇克完百度鮮整棲真真人李志本薦道潤志和道堅

等陞提點今凝元真人馬道逸飭舊圖新日益充大謂
宜立石鐫銘示永久元統元年特進神仙掌教凝和大
真人苗宗師召太清提點趙道真來京道潤志和等因
馬介趙屬筆於翀昔也馬真人乘傳北迴嘗識於衛趙
君用是惓惓遂不終讓序曰隋名苦縣曰仙源唐曰真
源宮曰紫極追上老子玄元皇帝以本帝系築宮縣隅
東北備嗣皇帝駕次之齊居栢曰奉元天寶二載易紫
極爲太清宋加太上老君混元上德皇帝名縣衛真真

宗兩謁太清壇奉元之陰東鄉祝拜易宮額曰明道金
仍其制錫良田豐祀事鴻惟太祖聖武皇帝奉天威君
六合天寤宸聰使車馳召長春丘仙翁崑崙之山厯數
年踰萬里覲遐朔推道餘沃淵衷拯生靈仁萬有其功
大矣老子臺宮之方葺也世祖皇帝潛藩下教令即位
錫以寶書申護禁勗匠役遣使致祭太清畢工敕翰林
承旨學士臣鶚製其銘中書左丞臣樞書其文中書右
丞相臣安圖樹其碑寵嘉之數滋隆往昔今道家殊流

皆宗老子太清明道源本所在長春道葉主嗣毫教知
所宗矣神惟大元慶運開兆李唐奉元得名元天陰隲
今宜兼用唐宋舊額榜曰奉元明道以尊皇極孰謂不
可趙聞之曰唯唯廼銘曰

老聃之生於殷之亳微妙有無天地橐籥非隱非見仕
周藏史龍乘風雲帝先誰子繩繩道裔上德是宏儼像
殿室堂陞峻嶒隋唐以來紫極崇峙玄教昭宣無間遐
遠惟茲亳土九曲神湫孰源其泉孰洩其流振古及今

繇數千載際我皇明華有餘彩昔我太祖雷厲八紘崑
崙赴召軒轅廣成坐進元言天心沃啓宇宙在手天慈
救衛有赫世皇光繩祖武乾德龍飛萬物斯覩溥泱寰
海如天之仁知風之自道系有真中統至元運開鳳紀
因臺仙源厲鄉仁里嶽竦雲騰宮復太清濬鑑昭錫詞
臣著銘趾邑艮方宮曰明道傾圯沮澤久未締造嗟哉
岸谷變易高深逢我盛明抗起湮沉張肩王隨石孟李
仲班班偉人繼拯元統至道坦坦至衆林林才角其力

德厭其心棲神棲真踵武徐起習馭輕轅通轍順軌載
定其址載我其宮煙霞洞府風雨幘幪山川會靈紫氣
充盜羽衆式瞻淵宗有象邀食於地邀樂於天果蓏在
圃稼穡在田聖祖神孫開此道域其寧不思荷帝之力
瞻彼蒼昊有開必先奉元明道名豈徒然太清在東長
春在北祈我皇祚永配無極

中州名賢文表卷二十九

欽定四庫全書

中州名賢文表卷三十

明 劉昌 編

富珠哩文靖公

碑銘

皇元故武略將軍濟南冠州萬戶府千夫長
監默勒齊公神道碑銘

聖朝統有天下制官以國人冠其上如古置監者然重
國體也兵名所部曰翼其監以北庭有武功者爲之濟

南冠州新軍萬戶府千夫長劉洧翼監將武略將軍未
赤以至大三年秋八月十有九日終南陽郟邑私第之
正寢享年七十有八於是公告老去軍蓋十有五年矣
既葬之明年其子孟格台暨其孫魯瑪台狀公平生走
汴階其嫺家子劉生汝止乞銘且言公之子孫再世能
讓蓋以公武足致位德足化家故也於是叙而銘之公
世出朔漠其族世曰魯瑪氏考曰希卜禪當天兵南墟
金社卒行間公寄跡在軍都帥府即署公扎拉圖鎮撫

屬副彈壓大兵伐宋從大將展札戰百丈山從萬夫長
伊蘇徹爾破黃先洞至元十有一年從都帥鄭國忠宣公
破沙洋攻新城明年冬從大軍擣江淝破關隘帥府以
先後功狀彰聞分兵二百署職總把自是宋平十四年
春正月勘定閩中有功行中書省版以舊職仍移書樞
密奏授忠顯校尉職爲真其年從忠宣公定嶺海薦陞
職樞密奏加昭信校尉職仍舊帥府署公鎮撫仍將其
兵十八年十九年帥府及行中書薦以檄遣公領大將

別部幹略戰效益有聞二十有一年詔諸戰將定功以
聞用是樞密奏遷武略將軍佩金符監長千夫時二十
四年夏六月也其年從行省討交趾署副都鎮撫號召
指蹤勇赴銳戰抵蠻都襲逋王嚴柵護集矢石兵無違
律省臣材之二十有五年歸駐鄂省以其功聞由是遷
監濟南冠州翼鎮戍湖南之桂陽元貞二年公以老疾
告其子華善以承信校尉佩符繼職公姿雄拔性勁直
事萃於下情捍於上以理申白無少阿徇佚老鄉邑優

游以終嗚呼北庭將校之良也夫人呼都克岱莽賚徹
爾大悲努皆前卒今夫人蘇氏子男五曰齊拉曰密桑
夫人呼都克岱出也曰華善母夫人莽賚徹爾義男曰
孟格台曰綽羅女三曰博囉歡適百夫長圖喇曰旺扎
勒適額森布哈曰巴延章適百夫長實喇男孫十曰鴈
瑪台曰明安達曰托音曰都爾伯特曰袞諾爾曰旺扎
勒圖曰博囉曰阿雅齊曰寶童曰碩通女孫十有一先
是公請老子齊拉當繼與其弟密桑讓其季華善華善

卒子幼齊拉子萬瑪台當襲又讓其弟明安達時公生存子孫交讓於當年鄉人義之銘曰

元氣磅礴八荒同樞孰裂據之朔南一拘神人膺圖龍見漠北聖聖迭作何判不一當至元初有事南方衆智羣力雷砰電翔噓風喻雲霧廊煙闢運臂伸指無功不集相時行間繫武略公雖職裨校克壯其戎歸老於家誨子教孫以禮以讓雍雍其敦稽公之生自始奮跡既昌其家又永其福悠悠汝波紫雲東我碑墓其阿百世

不磨

河南淮北蒙古軍都萬戶府增修公解碑銘
昔光祿大夫江西行省平章政事贈金紫光祿大夫大
司徒上柱國鄭國忠宣公推忠開武協運佐治功臣鄂
囉齊統蒙古軍四萬戶佐帝平宋開閩洛陽縣龍門山
之南伊水之東以治軍政至其子嗣都萬戶托干布哈
始構治宇以肅官寮今其孫嗣都萬戶察罕特穆爾偕
其副都萬戶實吉博吉謀曰舊治陋隘弊腐宜撤新之

始其地廣袤十畝因增倍於先治事之廳退息之室賓
佐之幘幪僣使之庥庇簿書之皮閣財物之庫庾庖厨
門閭譙樓隸舍至四十楹壯麗崇深名其堂前曰仁武
後曰忠益樓曰嚴更遣千戶約爾珠暨呼圖克特穆爾馳狀
徵記扎拉爾氏自行省特穆爾台摩哩忠宣公郭羅齊銀
青榮祿大夫上柱國湖廣等處行中書省左丞相托干
布哈贈守忠翊正濟美寅德功臣資德大夫河南江北
等處行中書省右丞同知行樞密院事布特勒濟贈保

忠經武致德宣忠功臣上護軍夷山郡公五世六襲及
今都萬戶自懷遠大將軍加昭勇年三十有二珠申氏
自博囉歡諾延行省兵馬都元帥塔齊爾蒙古軍四萬
戶布朗吉爾台橫州屯田萬戶府達魯花赤輕車都尉平
陽郡侯穆爾齊都元帥兼江東西大都督遜都台鎮國
上將軍江西道都元帥阿爾輝輔國上將軍江西道都
元帥副都萬戶平陽郡襄懋公伯勒格布哈六世八襲
及今副都萬戶自懷遠大將軍歷定遠加昭毅年三十

有九昭勇昭毅皆蒙古貴族世胄其祖與宗自太祖聖
武皇帝來繼忠勇靖朔漠開西域伐金伐宋一海寓著
勞績今兩都萬戶協心力輯軍衆居則恪官守動則整
戎行善於紀律斯可見矣乃序其事銘其堂所之碑曰
皇元受命震起天北風雲龍虎感會奮激羽翼爪牙交
濟其功分守方嶽帥總元戎河淮都侯峙閭嵩洛兩帥
鉅宗光世其爵統四大府兵政霜嚴節制涖止宜竦其
瞻斧斤山林梁棟柱礎以埏以植隆關帥宇仁里斯美

宅必處仁志在仁武熊羆化馴優游清暇退集燕室延
訪賓友志廣忠益煌煌聖朝武緯文經崇堂邃奧式永
攸寧翰林侍讀學士中奉大夫知制誥同修國史富珠
哩朶撰

普濟宮重建麻衣子神宇銘

距穰西百里而遠有山曰靈堂古麻衣子棲真之跡在
焉學道者狀其事云子出沒晉宋間今餘千年其間或
有因其跡而繕宮室宏道法者皆軼不紀今太易道人

毛守朴齷荆棘侈土木一新之慨然曰仙聖之跡失今
不錄將遂顛絕千載之下不有能筆孰開厥靈奉狀摯
肿委筆焉徵狀麻衣子姓李氏名和字順甫後際神人
更志康字惠和自號麻衣子貞觀間封惠慈廣德普濟
真人真人世居秦父思溫西寧令呂穆帝昇平元年春
二月十有五日生真人而紺髮美姿膂力絕等然性明
慧好經史契悟玄要而綽有才譽孝武太元九年時年
二十有八喟然太息曰吾年如此猶湛穢腥腐愚亦至

矣以學道之志告親請去西寧君責留之不爲止君曰
吾爲汝築別室聽汝所欲爲何如不答陰入祈口坐一
巖間彌月人不知君偕親黨求之遂采入結廬居之西
寧君迹見曰吾老矣職則汝襲無苦爾爲也不荅令親
黨逼之不起嘗獨行終南逢一道者藜杖芒屨狀貌龐
古倚阜危坐謂真人曰吾久汝候矣揖與語皆道祕也
由是神悟劃然道者授以祕訣戒曰終南非汝宅也南
陽之間湍水之陽直乾之方有山靈堂石峒其有神開

汝鄉汝則往之當有異人率衆拜汝汝慎拊之可以翕
神功於蒼茫問姓名道者曰吾左元太極也言訖不見
真人神其言往求靈堂於湍陽者久之莫曉所在道遇
樵者相與問答所自來及所欲往樵者欣然導至峒門
問樵何居曰此山俄頃化去乃益喜自是坐峒十有九
年時安帝義熙十年夏大旱居民張奭約衆計曰麻衣
子有道者也盍往叩之衆諾相率詣峒焚香置水於前
禱之真人初坐瞑目頃之顧曰何爲者衆以旱請讓却

之衆日旦暮請不輟真人苦拒者亦累日將夕有少年
十許輩前請曰人日紛紛何也真人語以其故少年請
但許之真人託以昧妄不敢諸少年復堅請真人怪諾
之翌日如諾雨果大至霽行山間見十有二人睡山陰
熟睨之皆負龍狀心異之還峒而十二人至皆稽顙曰
吾屬龍也所居之溪曰巫峽曰五雲曰岷山曰清遠曰
桐柏曰嶓冢曰崑崙曰武陵曰苧羅曰滌溪曰浣沙曰
澠池上帝以師道業有成敕令輔師行化耳真人稽首

帝居而推峒居龍別占一穴龍自峒入雲霧晦冥雷電
交作抉裂山背各潰一穴而去真人後游鄖鄉歷宋孝
武大明元年真人行年一百有一矣秋八月八日白鶴
翔集祥飈雷雲蔚熒扶護真人儼坐而逝鄖人即其地
築觀名以白鶴仙墳存焉唐貞觀十三年天子制表山
曰石門靈堂峰曰顯聖峒曰勝泉龍皆封公曰廣潤洪
潤咸潤慈潤靈潤施潤崇潤豐潤應潤慈潤顯潤保潤
封真人曰惠慈廣德普濟真人旌宮曰普濟果爾則太

宗以邁往之君首勦大業賜神號於宇內而於麻衣子之所宮褒奉殊特則靈堂道區古勝地也自後泯不可稽豈山川之運自有盛衰道自有汙隆人之爲事者或成或否道學者或斷或續操著述之任者或工或拙或足以傳或不足傳而至然邪皆無由知之今守朴挺然自奮於千載湮圯之餘追麻衣子之道於蒼莽寥落之際而振褊之平居則有水泉之利亢極則有膏澤之請一方之民將神明其所爲十二溪之神物將集靈異於

玄漠惟吾所令苟幽明順指人神効績則推而達之清
朝貞觀之褒有不必取榮異代者神嘗聞希夷子受道
於麻衣道者豈度世不死百世以下遨遊人間邪不然
將兩麻衣邪或度世不死滅沒六合徊翔故丘拊守朴
之跡而歎其精心苦力能紹其業也如此則守朴之籍
丹臺上玉室也將有日矣於是敘其事而銘之石銘曰
警虜真人挺跡有家咀道之腴土苴世華神人指迷大
華培塿靈堂崔嵬上列牛斗惟龍駢駢滅沒有無乃奉

帝旨爲吾卒徒窟宅八荒呼吸自我洧澤四施孰往不
可悠悠山雲鶴逝千載民之神之功猶不宰曰惟守朴
跡遠心同華觀峰出轉替呂隆泉流泓泓以溉以灌鬱
亢呂請曾不我捍有黔其首衆奔走之神眇莫覲守朴
其師蒼琰穹窿而刻斯語山英桓桓斥護終古

知許州劉侯民愛碑

至大元年秋奉直大夫許守劉侯既終更矣郡縉紳先
生田浦城劉興國偕舊家望族郡人之父兄長者謀創

侯字民之政於石屬筆小子卽懇讓不獲敢蹟侯行事
謨次之大德龍集己夏六月侯下車家政斬然聞無
雜謁其在猷爲苟有利民無或不舉許北趾於汴南捐
淮楚素號多事侯材識精敏百務叢劇聲容舒徐刃嬰
而節解吏無稽牘獄無梃訟不尚苛猛而凜不可犯自
公而優入則杜門端晏游泳典籍出則賓禮先覺隆獎
學校三時既隙則帥郡屬叩校官請益經史親爲之倡
繇是郡政翕然侯澤物仁而有方耕鑿樹畜求底實效

及終三年諸軍數牧外丘陵原隰墾闢殆盡初郊農買穀市僧連郡豪傲糴外關擅輕重以售嫠弱胥困乃立斗斛市距州治重脅糴翔價之法趨者如歸糴雖升合以上無敢推衄民農兩利之侯以事出法漸弛復襲舊至杖大馱數人法復立民頌歌之歲丙午河南諸郡飢流瘠日至春穀價勃湧首發私庾大縮價聽民糴募富民粟數萬鱗出糴市慮糴有不均也於諸社責其長日閱數賦與之夏雨戕麥得請出郡廩積年鼠耗鑿米薄

價紓民春夏徂秋無凋瘵者明年薦饑羸殍狼戾請省
出公緡賑之民爲蘇中統抵大德凡所立有司法程計
閱簿書彙帙度寘而據守不踰故勇於拯民而善禦其
害省大核屯田臨穎鄧艾口民稻田三百頃人有說省
曰此古屯也可復築之下侯按實之侯按至元中司農
研水利拓民業隆平生息之道也業此率三四十一年暴
取之民措何地省不避以兵民恫疾之狀迭陳不可卒
止宣徽歲遣使征羊馬法三十取一至則肆虐取人莫

誰何度其至今縣民大書其法於堊壁患遂止程約五
縣縣賦齊均凡出錢於縣官市物民間曰和買民產所
有猶未易供無之則估百倍賦官郡縣苦督責無敢拒
貪肆者亦陰幸漁獵雖瘡痍其民不恤侯深患之土有
則均賦之苟無之抗簡覆陳不允不止鄢陵扶溝產紅
藍猝不時買萬鉅時其地年歉而藍霧民大驚感省以
侯敏幹略趣買之相其故力請罷之是不獨仁於許又
有以仁其鄰也省檄論囚荆南時荆楚大水民饑歸請

撤禁山澤以活危墊省移中書如請民濟於阨是其澤
不獨囿於近又有以及其遠也其聽訟明察而果哀矜
惻怛未始不行其間襄城南距湛河與葉交壤葉民之
鹽取解池齊鹽止襄舊樹石河之南埂鐫以畫鹽之法
葉令妄徙而北侵襄民近百家嗾漕屬以其法酷穽之
兩縣飛狀鬪辯葉引陝漕合攻襄中以危法時侯偕省
使者會決之卒以理摧葉復石舊疆民底寧河南先民
踈土曠田價至弱雖有質鬻而契券闊略鹵莽逮今民

日生集叢蓁灌莽盡化膏沃價倍十百闕閱滋熾叅吏
蠹法孔穴焚出至有繇曠歲時而莫之決者侯既清白
復詳聽覽而洞情僞佑是懲非至未半歲決以百數訟
爲衰民葛英女嫁而奔人英蹟之獲他婦憚嚴其舅姑
而私竄外者寘家令妻教壻族事如其女返魂他屍者
歸婿不納一男子果爭之訟不決侯行縣詰之情立出
民有以計誣罣其同行者訟縣醉亡楮繙千獄逮人數
十訊不白屢愬州至據地以慟覘色詐立屈之決囚南

陽主婦告奴醜其夫三日死榜楚極憊毒獄久不立侯
讞曰實有毒立死無少緩者簡孚獄供有寃立貫之其
聽決多此類也舊水旱禱祠桑門羽流雜巫覡囂咀無
益一不取齊被精壺以走羣望靈貺昭荅嘗春旱禱八
龍井明日雨大作民有擁香拜舞治所者人既德侯侯
善使人而知所務長社尉解僻遠爲創築近郡治使與
庫傳狴狴相連峙徼循捍衛弭患無形三皇肇立民極
今天下通祠而舊郡祠陋丕構新之崇葺廟學植檜柏

六十四本築室藏書購塑工體先賢貌影自濂溪及紫陽朱子像而祠於學故實凡相交承則帥案屬厚贐禮去者於侯又最豐終讓卻之始終銖髮無取及是人益信在政矚矚徽牧風紀屢倚用之軋強鋤暴在人所不敢爲侯不憚也將退政之日其下讐伏如甫至談者偉異之名聲籍籍上游諸公多譽籍之交剡騰薦不一二數士論稱奉法恤民有古良二千石之風知言者是之侯名天孚字裕民家大名以國書生從事中書出判東

平移漕司擢知冠州遂遷許風岸蘄立器度凝遠春秋
方強擴用未既加忠孝豈弟出天稟能以學濟之淵乎
莫測也浦城名九疇興國名庭瑞皆仕焉而已者聲實
素著郡人望所推先郡既不忍弭忘侯德兩公倡帥之
人彌咨歎其公云卹既敘其詳乃最而詩之庸冀郡人
寥邈之思辭曰

郡侯繩繩三歲逆旅孰莫我矜侯吾父母我饑我寒煥
我舖我鳴柚於家田墾在野繫我窘躋均恫其身膏以

雨澤煦我陽春惟古立學定民之命治有本末禮樂刑
政誰蔑棄之謂能其官我侯至止德馨如蘭士蒙顒顒
侯教載之縉紳煌煌侯勞來之孰匪人哉而玩侯法將
薙芟之我用是恕善達而施天下之兼寧獨吾私一郡
是淹車聲鞞鞞民莫侯攬有堅其珉鑄配琬琰鼎鼎其
來疇允侯蹟跂予望之其永無極

安氏尊經堂銘

明明尊經安氏堂之用有儆惕予其銘之於在古昔挺

起神聖越紹上帝昭我明命暨蒼姬氏四術廼崇詩書
禮樂順古範鎔文武道衰四教崩弛孰其救之天縱夫
子龍馬獻圖用著著策吉凶悔吝開我人則二禪三繼
曰帝曰王典謨訓誥明我天常志欲有言形於詠歌雅
頌得所神人以和王綱失維列侯遞霸其敢僭踰筆討
無赦是謂四府其用不窮大禮大樂升降汙隆宇宙有
經終古莫忒民無能名功載人極鼎鼎儒者相與守之
孰吾堯桀相與陪之曾子思孟荀董王韓周程張朱以

達聖元不息不泯皇衷民彞其有能奮立百世師安氏
東垣世以儒名味道之醇服義之精百氏謏聞寧不有
當處宜下陳經無二上至小無內至大無外晦不加感
顯不加泰風雨震凌帡幪是屋六籍鳳峙疇匪雌伏安
父之嗣伯仲叔季穉子齒孫繩繩繼繼豈徒藏之斯務
明之豈徒尊之斯務勤之其徒之賢蘇伯修甫將以所
聞往相告語多岐亡羊克敬克念無或怠墮請以銘鑑
鎮平縣尹劉侯遺愛之銘

今至元三年歲次丁丑冬鎮平縣尹劉侯代去校官朱
秉誠耆舊楊仲賢梁國英士李昌祖等來曰侯以元統
二年冬涖縣審荒蕪課耕墾稅丁戶均差徭察事情靖
囂開獎士類隆風化集流散遂生養嚴法令弭偷剽始
至決訟百餘皆當愬日稀簿甲不紊里社耕學日修捕
邏日謹穴剽日戢三皇宣聖廟廡敝圯俎豆諸生廢弛
者日修舉遂暇無事他所赴愬憲部府廷者用侯推決
剖析無滯農書刻布民社曉耕植繭穀果蓏歲日增常

平義倉之儲歲日裕墾田歲日廣貫戶歲日衆憲暨府
皆剡薦廉約清畏自始及代無私謁衆日信將刻石永
思以示不忘敢請予曰吾故人也知其才惠政如此其
可辭侯名益謙字恭甫潁州太和人以蘄黃府史入憲
自淮荆三道掌書除萬億寶源提控案牘擢河南行省
理問所知事秩將仕郎選充本省掾史尹縣棗陽秩承
事郎尹是縣剛毅明果奉公忘私其天性然也因撫所
聞系以詩其辭曰

綿亘宛境跨帶穰邑大山盤互源泉悍急鎮曰陽館民
牧且耕金季置縣始號鎮平聖朝開濟分布諸侯之此
遥署襄府樊州中統至元遷易守令稽考事宜始復縣
政令長相因六七十年豈無惠愛畱此郊鄣誰如劉侯
慎終如始清己仁民懷古君子今其去矣日月有恒既
挽莫及而借莫能斯琢貞珉刻頌嘉績庶幾見聞追慕
無極

記序

大元通制序

至治二年冬十有一月皇帝以故丞相東平忠憲王之
孫中書左丞相位右丞相總百官新庶務徵用老成開
明治道皇元聖聖相繼百有餘年宸斷之所予奪廟謨
之所可否禁頑戢暴仁恤黎元綽有成憲然簡書所載
歲益月增散在有司既積既繁莫知所統挾情之吏用
譎行私民恫政蠹臺憲屢言之鼎軸大臣恒患之仁廟
皇帝御極之初中書奏允擇耆舊之賢明練之士時則

若中書右丞巴罕平章政事商議中書劉正等由開創以來政制法程可著爲令者類集折衷以示所司其宏綱有三曰制詔曰條格曰斷例經緯乎格例之間非外遠職守所急亦彙輯之名曰別類延祐三年夏五月書成勅樞密御史翰林國史集賢之臣相與正是凡經八年事未克果今年春正月辛酉上御櫻殿丞相援據本末奏宜如仁廟制制可於是樞密副使完顏納丹侍御史曹伯啓判宗正府布延集賢學士奇徹翰林直學士

曹元用以二月朔奉旨會集中書平章政事張珪暨議
政元老率其屬衆共審定時上幸柳林之辛巳丞相以
其事奏仍以延祐二年及今所未類者請如故事制若
曰此善令也其行之繇是堂議題其書曰大元通制命
冊序之冊惟聖人之治天下其爲道也動與天準其爲
法也粲如列星使民畏罪遷善而吏不敢舞智御人鞭
笞斧鉞禮樂教化相爲表裏及其至也民協於中刑措
不用二帝三王之盛盡於此矣雖刑罰世輕世重而士

制百姓於刑之中以教祇德古之制也聖朝因事制宜
因時立制時有推遷事有變易謀國之臣斟酌損益以
就中典生民之福也仁廟開本於先繼志於今萬世慮
也雖然明罰敕法朝廷之道揆在焉惟良折獄哀敬折
獄有司之法守親焉源則濬矣流斯承之可不慎歟

張文忠公歸田類藁序

聖朝牧菴姚文公以古文雄天下天下英才振奮而宗
之卓然有成如雲莊張公其魁傑也公自弱齡以才行

名縉紳間仕於朝盡謹言行直道自禮部尚書參議中
書請謁親濟南俄以吏部尚書召親疾終喪省臺奏召
至再至三至五六不起文皇即位闕陝以西兵侵旱厲
民莠政荒拜行臺中丞廼起西馳及秦民四流亡耄穉
子遺若鼎魚筏蟻天毒方熾湯沸泉溢吏士猖蹶目瞠
神駭莫克拯拔公懇惓率倡務用仁術官帑不繼傾已
囊橐日不勝給每每大慟民僅蘇復公疾薨天子聞之
惻然閔悼贈攄誠宣惠功臣陝西等處行中書省平章

政事柱國追封濱國公謚文忠中外嗟惜無何翀使憲
陝西士民談道琅琅耿耿未始不悽愴以聽之秦人悲
思樹石刊頌不忘公質厚剛毅正大明白仁於家忠於
上確信不渝已善不伐人之善推獎若不及其文淵奧
昭朗豪宕安帖其動盪也雲霧晦冥霆砰電激其靜止
也風熙日舒川嶽融峙綽有姿容闢翕頓挫辭必已出
讀之令人想像其平生千載而下凜有生氣不可磨滅
斯足尚矣公素知翀其子引偕其婦翁吳肅彥清持公

所輯歸田類藁三十八卷徵序因書其概如此公諱養
浩字希孟雲莊其自號也行業履歷家乘國史有載茲
不容贅元統三年龍集乙亥二月甲寅朔中奉大夫江
淞等處行中書省參知政事富珠哩朮序

詩頌

范墳詩

有序

宋蜀郡開國公范鎮景仁謚忠文其一世盛德偉烈光
著史籍人固知之其葬在襄城汝安鄉推賢里載東坡

集中甚詳襄城故隸汝州州來訪問故老其墳儼然故在已爲野夫豪農耕爲禾黍之區矣范氏當金季猶有居墳左者自經兵燹不知所存拊事歎閔故爲作詩以記其概幸在官君子知其爲先賢遺壠庶有以處之

忠文峨嶠英始也跡甚微堂堂薛簡肅旌隼西南飛其
人古廉守肯持鉤醬肥所得一偉人天下大布衣引以
賓王家光映春宮闈昭陵宋仁主前星久無輝犯諱言
所難雷電每霽威雄哉鍊石手妙補天巍巍丞相江南

來雲掩扶桑暉舊德陳若辭往往阮謗譏諸賢抗章疏
弱卒攻堅圓公力幹禹鼎正氣碑黃扉荆舒憤至骨斥
語筆自揮贈之以蕙蘭何往無芳菲時公與司馬聲偕
玉琴徽解冠挂神武甘老西山薇九寓日瞽瞍赤子將
疇依兩公幸無恙起拯或庶幾嗣君元祐初痛洗前人
非民望屬司馬欲邀天爲戰帝命起公臥門久車停駢
君實了吾事此外何所希清風溢寰海不啻嚴陵磯公
既晚家許道德人所排襄城卜封竈汝穎皆京折我來

訪遺壠名姓存依稀來仍散兵燼雨雪無留霏公名在
天下豈逐薤露晞誰能禁耕牧盛事乘新機吾力不足
振感歎徒歔歔

駐驛頌

有序

繼天體道敬文仁武大昭孝皇帝即位修明世祖皇帝
隆平故事以故東平忠憲王之孫司徒忠簡王之子拜
珠丞相中書至治元年詔若曰忠憲弼我世皇功在社
稷德在生民其敕詞臣即王所有范陽采地朔南康莊

碑之昭示悠久冬刻銘既完十有二月丞相承詔歲事
凡犒工勞衆郡邑無所擾饋賀無所受天子遣使牲牢
之饗鉅鬯之禋數異禮隆不一而止父老聚觀或至感
泣明年春正月帝幸涿州至碑所重瞳凝竚顧瞻有懷
秋九月幸易州還丙午帳殿碑垣之南駐輦御殿上顧
丞相若曰汝祖考之績之盛世載帝室維朕不忘亦惟
汝之賢有以相朕益懋世德故也丞相頓首謝翌日既
旦太官饌已上步入帳殿御金椅座碑右丞相稱觴獻

萬歲壽從臣以次進觴天顏和怡甚久迺去丞相諭翀
曰皇上眷我祖考至此不刻以志則未有以稱汝其銘
之翀祇栗奉命用敢敘曰太祖皇帝開創大關王

孔溫關

哇太師魯國忠關

革關

定疆

宇繼世國王皆著大功忠憲王關

有八

嶷然以鉅德大人相世廟統關

度底雍熙仁覆

天下以垂大猷以迪來哲皇上念垂統之艱難守成之

不易懷往烈關

聖度關

非一介臣能窺萬一敢

即所聞見而獻頌曰

闕

赫赫聖明嗣大寶仙

闕

紹我皇制慨想先正

闕

佐我家奄奠八紘帝

闕

我太祖疆理萬國忠宣

忠武功高輔翼雲雨方

闕

掃華夏之民國王蔭

葆巍巍世皇幅幘既同

闕

成治隆忠憲之功奕奕忠憲

虎變莫測年未及冠

闕

著明烈端冕正笏不動聲色儔

傑在職儒碩在廷何殊不昭何墜不舉何絕不紹何遠

不緒三十年間再秉鈞軸天極地

闕

孰匪亭毒至元始


終中外人心大耄韶童締慕至今天日清明終古莫晦
柱石廟廊宗社永賴相國今誰忠憲胤嗣民之望之忠
憲是繼克繼克庸滋益光大一以至公熙我天載帝謂
侍臣丞相之賢家世所因其敕詞垣于忠憲勲大侈以
文配永河山以竦見聞涿鹿范陽王有采食山川蒼蒼
北拱帝極蛟螭盤拏大鼇負之德音不廟神訶護之六
龍翱翔馭日霄漢再狩郊垌日此銘篆淵鑑昭回駐驂
永懷廊清煙霾以霽九垓從臣焜煌千乘萬騎能不激

昂以勵忠義世世夔契生此德門君臣道合豈徒示恩
忠憲來雲源源裔裔臣頌茲刊丕告無既

附錄

昌按元史文靖公爲學一本於性命道德而記問
宏博文章簡奧典雅深合古法用是天下學者仰
爲表儀居國學最久自許文正公後以師道自任
惟耶律有尚及公而已有文集六十卷今多不傳
子遠死於忠遠婦死於節一門之美有足尚焉昌

至鄧州閱士籍得其後之習業於官者猶自稱魯
參政家云昌在菊潭識



中州名賢文表卷三十